



Neke koristi i mudrosti propisivanja hadža (Meka)

Hatib: dr. Abdullah ibn Avad el-Džuheni

17. zulkade 1443. po Hidžri / 17. juni 2022.

Hvala Allahu, Jakom i Silnom, Onome Kome jedinom pripada upravljanje i stvaranje, Neovisnom o svim svjetovima, Njemu ne koristi pokornost onih koji Mu se pokoravaju, niti Mu šteti nepokornost onih koji su Mu nepokorni. Stvorio je ljude i džine samo da bi Ga obožavali, pokoravali se Njegovim naredbama i ne kršili ih, i upozorio je grešnike na žestoku i bolnu kaznu, koja je pogodila mnoge prijašnje narode. Svjedočim da nema boga osim Allaha, jedinog, Koji nema druga, i svjedočim da je Muhammed, sallallahu alejhi ve sellem, Njegov rob, poslanik i prijatelj, istinoljubivi i povjerljivi, koga je Allah poslao kao milost svjetovima i dokaz protiv inadžija, neka su na njega Allahovi blagoslovi, pozdravi i milost, zauvijek, do Sudnjeg dana, i na svu njegovu braću, poslanike i vjerovjesnike, i na njegovu porodicu, ashabe i sve one koji ih slijede u dobročinstvu do Dana kada će Allah naslijediti Zemlju i sve što je na njoj, a On je najbolji nasljednik.

O muslimani, oporučujem sebi i vama bogobožnost, ona je osnova svakog dobra i izvor dobrote. Allah nam je propisao različite vrste ibadeta, kojima ćemo Ga obožavati, neki su isključivo tjelesni, kao što su post i namaz, neki su samo materijalni, kao što je zekat i sve ostale vrste obaveznog ili dobrovoljnog trošenja imetka, a neke ibadete čovjek izvršava tijelom, ali i troši imetak na njih, pa se za njih kaže da su tjelesno-materijalni ibadeti, kao što je hadž – hodočašćenje Allahove svete Kuće, za koji čovjek izdvaja svoj najvredniji imetak i podnosi tegobe putovanja.

Poštovani vjernici, u ovim blagoslovljenim danima muslimani sa istoka i zapada zemljine kugle dolaze u posjetu Allahovoj svetoj Kući, radi obavljanja dužnosti hadža, pokoravajući se Allahovoj naredbi i slijedeći sunnet našeg vjerovjesnika Muhammeda, sallallahu alejhi ve sellem.





Hadž je jedna od strogih vjerskih obaveza, u kojoj se okupljaju muslimani radi zajedničkog izvršenja ovog ibadeta, onako kako ga je obavio Allahov Poslanik, neka su na njega i njegovu porodicu Allahova milost, blagoslov i mir. Ovo okupljanje obiluje mnogobrojnim koristima i pomaže u dobročinstvu i bogobožnosti.

Muslimani hodočaste Allahovu Kuću, kod koje osjećaju posebnu blizinu Allahu, džellešanuhu, njihove duše se pročišćavaju i uzvisuju, njihova se srca raznježuju i osjećaju strahopoštovanje kad spomenu Allahove ime, i to je ono što ih drži zajedno. To je kibla prema kojoj se okreću u namazu i oko koje se okupljaju, i ona je njihov bajrak u čiji se hlad sklanjaju, i pod kojim hode i iznova mu se vraćaju. Bajrak imana: La ilahe illallah Muhammedu resulullah!

To je akida – uvjerenje, vjerovanje – koja nadilazi i briše sve razlike, etničke, rasne, jezičke, geografske i sve ostale, u njoj pronalaze snagu jedinstva i korist okupljanja pod bajrakom imana. Razlog koji ih poziva ovom okupljanju jesu riječi Uzvišenog: "... i ogласi ljudima hadž!" – dolazit će ti pješke i na devama iznurenim; dolazit će iz mjesta dalekih" (El-Hadždž, 27), a temeljni postulat pod kojim se ono odvija jesu riječi Uzvišenog: "I kada smo kao pribježište Ibrahimu pokazali mjesto gdje je Hram, rekli smo: 'Ne smatraj Nama nikoga ravnim, i očisti ovaj Hram Moj za one koji će ga obilaziti, koji će tu u blizini njegovoj stanovati, i koji će molitvu obavljati'" (El-Hadždž, 26).

Ni manje ni više od toga, nijedna druga riječ niti djelo, niti u ime bilo koje isprazne parole, isključivo je to posvećivanje namjere i djela Allahu, džellešanuhu, i ostavljanje svega osim Njega: nikoga ne obožavaju osim Njega, nikome ne upućuju dove osim Njemu, nikoga ne spominju, hvaleći Ga, slaveći i veličajući, osim Njega, nikome se ne odazivaju, ponizno, skrušeno i sa strahopoštovanjem, osim Njemu.

Poštovani vjernici, bojte se Allaha i znajte da vas Allah nadzire u svakom vremenu i svim vašim stanjima, u noći i danu, i zato budite učtivi i obazrivi prema svom Stvoritelju i pridržavajte se islamskog bontona u ovim svetim mjestima, nemojte sknaviti njihovu svetost činjenjem bilo kojeg grijeha i činite što više dobrih djela, čistih i iskrenih u ime Njega, ona će biti vaša opskrba i svjetlost na Danu povratka, i





molite svoga Gospodara da vam podari Svoju pomoć i uputu, samo On upućuje na Pravi put.

Uzvišeni kaže: "Hadž je u određenim mjesecima; onom ko se obaveže da će u njima hadž obavljati nema snošaja sa ženama i nema ružnih riječi, i nema svađe u danima hadža. A za dobro koje učinite Allah zna. I onim, što vam je potrebno za put, snabdijte se. A najbolja opskrba je bogobožnost. I Mene se bojte, o razumom obdareni!" (El-Bekara, 197)

O muslimani! Uzvišeni Allah, kaže: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Poslanik, sallallahu alejhi ve sellem, rekao je: "Ko na mene donese jedan salavat, Allah će na njega donijeti deset salavata."

Sehl ibn Abdullah kaže: "Donošenje salavata na Muhammeda, sallallahu alejhi ve sellem, najvredniji je ibadet, jer je to ibadet koji je Uzvišeni pripisao Sebi i melekima, a zatim ga je naredio vjernicima, što nije slučaj s drugim ibadetima."

Allahu moj, blagoslovi i spasi Svoga roba i poslanika Muhammeda, sallallahu alejhi ve sellem.

Koji je to stepen, i koje je to poštovanje! Njegovu kakvoću nije moguće dosegnuti.

Njega uči i ponavlja sve što postoji, cijeli univerzum odgovara na njega i sve što je između neba i ispuni se svjetlošću zbog Allahove pohvale Svom robu i vjerovjesniku Muhammedu, sallallahu alejhi ve sellem.

